

03 磅米芳

張淑芳

「欲磅矣！」聽著這句話，囡仔人耳空隨掩起來，等phòng一聲煞，隨閣倚過去看，彼是一種期待、一種歡喜、一種幸福的感覺。

母知你敢有食過米芳？母是彼種店仔買會著，食著有芳有芳彼種，是彼種現磅起來，燒燒脆脆閣甜甜彼種。佇民國五、六十年代，真濟囡仔人無啥物四秀仔通食，三頓食會飽就偷笑矣。除非是過年，平常時根本毋敢想想欲食糖仔餅，所以見若聽著有人咧喝：「磅米芳的來矣。」規陣囡仔就歡喜甲。阿母看囡仔遮爾歡喜，想講平常時嘛毋捌提錢予囡仔買糖仔食，這時陣實在毋甘予囡仔失望，總是會予阮提空的牛奶罐仔貯一管米，去磅米芳遐排隊。

長一排等欲磅的罐仔排佇塗跤，會當看出每一家口仔環境的好壞。厝內較艱苦的較細罐，厝內較會得過的就較大罐，面頂閣會加囡一包塗豆。毋過無論環境啥款，囡仔人全款足樂暢的。佇邊仔看頭家咧磅米芳，逐家目睭攏金相，看頭家煮糖漿，倒入去今仔磅好的米內底，攪攪咧才閣倒入去柴盤仔內面砵予平，趁燒切做一塊一塊。切米芳的聲音是遐爾好聽，囡仔人的喙瀾是強欲津落來。

啊若厝裡無閒愛鬥作穢的囡仔，無法度踮現場看頭家

表演，厝邊隔壁的囡仔嘛會做報馬仔，報講後一個就是恁兜矣。囡仔知影免佬久就有芳閣脆的米芳通食，未曾未就喙笑目笑。阿母佇邊仔看，嘛綴咧歡喜，啊這個月的米是毋是有夠通食，就先莫去想去矣。

這幾年仔已經罕得看有人咧磅米芳矣，彼工去菜市仔，想袂到煞看看有人咧磅，磅好幾若袋囡佇邊仔聽候人買，毋過攏無人來交關。米芳擺冷去矣，頭家嘛是相連繼咧磅。一聲「欲磅矣！」逐家閃甲離離離，驚去予嚇驚著。phòng一聲，聲音聽起來煞有淡薄仔孤單。我共頭家買一包仔來食，全款甜甜脆脆，毋過食著的是一種記持，我已經食無彼種幸福的滋味矣！